



Bjørk Lange Kristensen
Inatsisartunut Ilaasortaq (D)
inatsisartut@inatsisartut.gl

Kalaallit Nunaannut motorcykelinik eqqussisinnaatitaaneq pillugu § 37 naapertorlugu apeqqummut 2023-101-imut akissut

10-07-2023
Suliap nr.: 2023 - 16831
ID nr.: 87728406

Asasara Bjørk Lange Kristensen,

Inatsisartut Suleriaasianni § 37 naapertorlugu Kalaallit Nunaannut motorcykelinik eqqussisinnaatitaaneq pillugu apeqquteqarsimavutit. Apeqqutigisatit uannut akisassanngortinneqarsimapput. Apeqqutigineqartut tullingguuttuni ataasiakkaarlugit uteqqinneqarput akissummillu malitseqarlutik.

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
www.naalakkersuisut.gl

Apeqqut 1: Kalaallit Nunaannut motorcykelinik eqqussisinnaatitaanerup inerteqqutaalersinneqarneranut aaliangiisimanermit tunngaviit pingaarnerit suunikuusimappat?

Akissut: Taamanikkut Kalaallit Nunaannut ministeriunerusimasup Inatsisissatut siunnersuutaani nr. L 172 ulloq 13. marts 1980-imi saqqummiunneqartup nassuiaatitaani atuarneqarsinnaavoq, taamanikkut Landsrådiusimasup 1978-imi ukiakkut ataatsimiinnerminni siunnersuummik oqaluuserinninnermigut, inatsisissatut siunnersuutip akuersissutigineqarnissaanik innersuussuteqarneratigut inatsisissatut siunnersuut akuersissutigineqarsimasoq. Inatsisissatut siunnersuutip suliarineqarnerani tunngavilersuutit pingaarnerit makkuusimapput:

1. Taamanikkut sukkanerpaamik 40 km/t ingerlasoqarsinnaasimavoq. Sukkanerpaamik ingerlaffiusinnaasorli motorcykilerartunit malinneqarsimangilaq taamaasillutillu namminneq avatangiisitillu navianartorsortittarlutik. Inatsisartuni oqallinnermi oqaatigineqarpoq Kalaallit Nunaanni piffissami 1970-76-ikkunni motorcykelinik ajutoornerit inuit 29-t inuunerannik naleqarsimasut. Piffissami tassani motorcykelit 43-70-iusimapput.
2. Taamanikkut sukkavallaanngitsumik ingerlasoqaqqusaanera aallaavigalugu Landsrådiusimasup motorcykelit pisariaqanngitsutut nalilersimavaat pisariaqartitsisut knallertit biilillu atorlugit angalasarsinnaammata.
3. Motorcykelinik Kalaallit Nunaannut eqqussisinnaanerup inerteqqutigilerneratigut ajornartorsiut qaangerniarneqarsimavoq motorcykelit ukiut ingerlanerini ikiliartortussaammata.

Apeqqut 1.a: Ukiut 43-ut qaangiussimalersullu tunngavilersuutit taakku Naalakkersuisunit suli ullumikkumut atorneqarsinnaasorineqarpat?

Akissut: Massakkut Naalakkersuisuusut apeqqut eqqartornikuunngilaat.

Apeqqu 2: Motorcykelinik eqqussinnaanerup inerteqqutaajunnaarsinnissaanut inatsisitigut suliniutit suut ingerlanneqassappat?

Akissut: Eqqusseqqusiunnaarsimanerup taamaatinneqarnissaa pillugu Atassut 2011-mi ukiakkut ataatsimiinnermi siunnersuuteqarnikuvoq. Inatsisinik atuutsitsinermut ataatsimiititaliaq taamanikkut isumaliutissiisummik suliarilluakkamik saqqummiivoq ima nipilimmik:

"Inatsimmik atuukkunnaartitsineq (allannguinerluunniit) Folketingip atuuttussanngorlugu aalajangiiffigissagaa piumasaqaataavoq. Inatsimmik atuukkunnaartitsineq (allannguinerluunniit), Naalagaaffiup inatsisaanik allamik allannguisariaqarnermik kinguneqassaaq. Taamaalilluni nalunaarut nr. 187 19. maj 1980-imeersoq Kalaallit Nunaanni qamutit motorillit nalunaarsugaanerannik nalunaarutip allanngortinneqarneranik nalunaarutip atuukkunnaarnissaa pisariaqassaaq, motorcykelit 30. juni 1980-ip kingornatigut Kalaalit Nunaannut eqqunneqartut imaluunniit tassani sananeqartut taamaattut nalunaarsorneqarsinnaannginnerannik, tassani aalajangersagaqarmat. Kalaalit Nunaanni aqqusinertigut angallannermut inatsimmik, aamma Kalaallit Nunaanni qamutit iluarsartuunnerat pisatsersuutaallu pillugit nalunaarummik allannguinnissaq pisariaqarsinnaavoq, inatsit eqqusseqqusinnginnermut tunngasoq atuukkunnaartinnera pissappat sunnerneqartussat isumaliutigisassat immikkoortoq tullermi maluginiagassaapput. Motorcykelit eqqunneqaqqusaannginnerat sananeqaqqusaannginnerallu pillugu Kalaallit Nunaanni inatsimmik atuukkunnaartitsinissaq (allannguinnissarlunniit) Namminersorneq pillugu inatsimmik allannguinnissamik pisariaqartitsilersinnaavoq. Biilinik snescooterinillu eqqussinermi akitsuutit atuuttut assigalugit, motorcykelinik eqqussinermi akitsuusiinissap nassataanik, Inatsisartut inatsisaata nioqqutissanik eqqussuinermi akitsuutinut tunngasup allanngortinnissaa pissusissamisuussaaq."

Apeqqu 3: Motorcykelinik eqqussinissap inerteqqutaajunnaarsinnissaanut pisortanut aningaasatigut allaffissornikkullu kingunissaat suuppat?

Akissut: Akissuteqarnissaaq eqqarsaatigalugu Aningaasaqarnermut Naligiissitaanermullu Naalakkersuisoqarfimmut paasissutissanik pissarsiortoqarsimavoq taakkulu ima akissuteqarput:

"UKA2011/89-imut isumaliutissiisummi aningaasatigut allaffissornikkullu sunniutissanik Inatsiseqarnermut Ataatsimiititaliap misissuisimanera tassunga ilanngullugu motorcykelit amerlinerisigut motoorinut akitsuutit aqqutigalugit isertitat annertusinissaanik oqariartuutaa kiisalu motorcykelit eqqunneqaqqusaannginnerat sananeqaqqusaannginnerallu pillugit Kalaallit Nunaannut inatsit 14. maj 1980-imeersoq naalagaaffiup inatsisigimmagu danskit naalakkersuisuinik isumaqatiginninniutigisariaqarnissaanik oqariartuut Naalakkersuisoqarfiup isumaqatigaa. Siunnersuutip uuma kingunerisaanik eqqussuinermi akitsuut pillugit inatsisartut inatsisaata atuuttup allannguutissatut siunnersuusiorfigisariaqalersinnaanera Naalakkersuisoqarfiup isumaqatigaattaaq, taamaasiornikkut motorcykelinik eqqussinerit


akitsuuserneqartalersinnaaqullugit. Allaffissornikkut suliaasaalersussat tamarmiusut atorfilimmit ataatsimit ukioq naallugu sulisussamit isumagineqarsinnaasussatut Naalakkersuisoqarfimmit nalilerneqarpoq. Tassungali tunngatillugu Naalakkersuisoqarfimmit oqaatigineqassaaq motorcykelit akitsuusersorneqartalemissaanik suliaq Akileraartarnermut Aqutsisoqarfimmit eqqussinermi akitsuusersuisarnernut tunngatillugu suliaasanut nalinginnaasunut ilanngullugu suliarineqartussaassammat taamaattumillu immikkut allaffissortariaqalersitsinaviarani."

Apeqquut 4: Naalakkersuisut pineqartumut allanik paasissutissiisinnaanerlutik?

Akissut: Naamik.

Neriuppunga matuma qulaani apeqquutitit akineqarsimassasut.

Inussiarnersumik Inuulluaqqusillunga



Erik Jensen